

KEFAHAMAN DAN PENERIMAAN MAHASISWA UNIVERSITI AWAM TERHADAP GERAKAN ISIS

CHE MOHD AZIZ YAACOB, BAKRI MAT, FAKHRORAZI AHMAD, MOHD
AZIZUDDIN MOHD SANI, RUSDI OMAR & KAMARUL ZAMAN HAJI
YUSOFF

ABSTRAK

Kemunculan kumpulan ekstremis The Islamic State of Iraq and Syria (ISIS) di tengah-tengah kemelut dan pergolakan politik di Timur Tengah telah menjadi isu utama perbincangan mengenai ancaman terhadap keselamatan di peringkat domestik dan antarabangsa. Dalam konteks Malaysia, kemunculan kumpulan pengganas ini telah diberi perhatian serius oleh kerajaan. Serangan membabitkan rakyat Malaysia yang berlaku di rantau Timur Tengah dan siri tangkapan yang dilakukan oleh pihak berkuasa menunjukkan bahawa rakyat Malaysia telah dikenal pasti terlibat menyertai perjuangan ISIS. Tujuan kajian adalah untuk mengenal pasti tahap kefahaman dan potensi penerimaan dan penolakan terhadap ISIS dalam kalangan pelajar-pelajar institusi pengajian tinggi (IPT) di Semenanjung Malaysia. Kajian menerusi kaedah kajian rentas (cross-sectional study) dengan menggunakan borang soal selidik dan perbincangan kumpulan fokus (focus group discussion, FGD) telah dilakukan ke atas 1200 responden dari kalangan pelajar-pelajar IPT awam dan swasta di Semenanjung Malaysia yang dibahagikan kepada 4 zon utama (Utara, Tengah, Selatan dan Pantai Timur). Hasil kajian menunjukkan bahawa majoriti pelajar IPT masih belum mempunyai pemahaman jelas tentang ISIS. Tahap kefahaman responden tersebut dipengaruhi oleh pelbagai faktor seperti media massa, media sosial dan rakan-rakan. Walaupun secara umumnya dapatan dari sudut tahap penerimaan dan penolakan menunjukkan bahawa majoriti responden didapati menolak perjuangan ISIS, masih terdapat sebilangan kecil responden yang masih belum pasti mengenainya malah ada yang didapati bersetuju dan menyokong ISIS. Hasil penyelidikan ini menunjukkan peranan lebih serius harus dimainkan oleh kerajaan untuk menangani isu ini sebelum ia berkembang menjadi ancaman yang lebih serius kepada keselamatan negara.

Kata Kunci: Keselamatan Negara, The Islamic State of Iraq and Syria (ISIS), Keganasan, Institusi Pengajian Tinggi

ABSTRACT

The emergence of the extremist group The Islamic State of Iraq and Syria (ISIS) in the midst of political upheaval in the Middle East makes it becoming a focal point, both at the domestic and the international fronts. In the Malaysian context, ISIS' emergence has been given serious attention by the government. Malaysians participants in ISIS in the Middle East, and series of detentions by the authorities, show that Malaysians are involved in ISIS. The objective of this study is to ascertain

the level of understanding about ISIS among students of higher learning institutions in Peninsular Malaysia and to ascertain the potential for their acceptance and rejection of ISIS' struggle. This study was a cross-sectional study using questionnaires and Focus Group Discussion (FGD). A total of 1200 respondents were selected among students of both public and private higher learning institutions in Peninsular Malaysia who were divided into four different zones (North, Central, South and East). This study revealed that most of the respondents still do not fully understand ISIS. As a whole, the level of acceptance of ISIS' struggle among the students is low. Their level of understanding is influenced by various factors such as the mass media, social media and friends. Although the result on the acceptance and the rejection levels of ISIS' struggle generally indicates that majority of the respondents resists ISIS, a small number of respondents is still uncertain about it while some even agree with and support ISIS. The result of this research shows that the government has to play a more serious to tackle this issue before it becomes a more serious threat to the national security.

Keywords: National Security, The Islamic State of Iraq and Syria (ISIS), Violence, Higher Learning Institution

PENGENALAN

Dalam era globalisasi, negara berhadapan dengan pelbagai ancaman yang boleh menjejaskan kedaulatan dan keutuhannya. Ancaman ini bukan sahaja melibatkan elemen dalaman tetapi juga luaran yang semakin dominan iaitu ancaman rangkaian kumpulan pengganas di peringkat antarabangsa. Dalam konteks semasa, pergolakan politik dunia yang semakin tidak menentu khususnya di negara-negara Timur Tengah telah menjadi antara faktor utama kewujudan ancaman The Islamic State of Iraq and Syria (ISIS) atau lebih di kenali sebagai Islamic State (IS). Malaysia secara jelas turut terkesan dengan penularan ancaman ini.

Keterlibatan rakyat Malaysia terhadap perjuangan ISIS ini sangat membimbangkan apabila kita digemparkan dengan serangan bom berani mati oleh Ahmad Tarmimi Maliki (26 tahun) di ibu pejabat SWAT Iraq di al-Anbar (The Malaysian Insider, 9 Disember 2014) dan satu insiden serangan di Homs, Syria oleh Ahmad Affendi Manaff (27 tahun) (Utusan Harian, 2014). Rentetan daripada itu, satu lagi peristiwa melibatkan rakyat Malaysia apabila Datuk Ayub Khan Mydin Pitchay, Ketua Penolong Pengarah Counter Terrorism, Cawangan Khas Bukit Aman mengesahkan rakaman video yang berdurasi selama 30 saat yang memaparkan penyembelihan warga Syria oleh lelaki Arab yang dipercayai pengintip tentera Bashar al Assad dilakukan oleh Mohd Faris Anuar yang berusia 20 tahun yang berasal dari Gurun, Kedah. Rakaman tersebut juga memaparkan Muhammad Wannady Mohamad Jedi, 25 tahun yang berasal dari Durian Tunggal, Melaka yang turut bergambar dengan seorang lelaki yang mengangkat kepala mayat yang tersebut (Temu bual Dato Ayub Khan, 28 September 2015; Azrai,

2015). Melihat keadaan yang semakin serius, pihak Ibu Pejabat Polis Bukit Aman mengeluarkan statistik kepada umum bahawa seramai 61 orang melibatkan 10 keluarga termasuk 5 orang anak yang dibawa bersama telah berada di Syria untuk menyertai ISIS. Daripada jumlah tersebut, seramai 14 adalah wanita dan 6 orang merupakan kakitangan kerajaan (The Star, 3 Disember 2015). Sejurus itu, Malaysia sekali lagi digemparkan dengan penahanan remaja perempuan berumur 14 tahun di Kuala Lumpur International Airport (KLIA) yang berasal dari Muar, Johor untuk ke Mesir dan seterusnya ke Syria bagi tujuan menyertai ISIS. Manakala kes-kes lain antaranya pihak polis menahan seorang suri rumah yang bertindak menghasut dan mempengaruhi beberapa wanita lain untuk berjuang menyertai ISIS di Syria dan Iraq (Temu bual Dato Ayub Khan, 28 September 2015).

Kejadian ini menyebabkan kerajaan mulai memandang serius akan perkara ini memaksa Perdana Menteri Malaysia, Yang Amat Berhormat Dato Seri Mohd Najib Tuan Abdul Razak membentangkan Kertas Putih di Parlimen sebagai bantahan terhadap perjuangan ISIS ini. Kerajaan Malaysia melalui pembentangan Kertas Putih ini mengemukakan usul bagi mendapatkan sokongan parti pembangkang untuk sama-sama mencegah dan menentang anasir ISIS di Malaysia (Pejabat Perdana Menteri, 2015). Bersama dengan ini juga Perdana Menteri menyatakan kebimbangan terhadap potensi menjadi ancaman kepada negara khususnya kepulauan rakyat Malaysia dari kawasan konflik di Syria dan Iraq akan meningkatkan risiko keselamatan negara. Mereka yang dilengkapi dengan pengalaman, kemahiran, taktik peperangan dan lain-lain lagi berupaya melakukan aktiviti keganasan secara sendiri. Di samping itu, wujudnya sel-sel penganas dan membentuk jaringan dengan kumpulan-kumpulan militan sedia ada dalam negara atau serantau. Beliau turut mencadangkan satu undang-undang baru digubal bagi menangani, membanteras dan mengambil tindakan terhadap rakyat Malaysia yang terlibat dalam aktiviti militan dan kumpulan penganas.

Justeru, dalam menghadapi ancaman pengaruh ISIS ini, pihak kerajaan menggunakan pendekatan pencegahan, pengawalan dan penyelesaian atau transformasi sebagai pendekatan utama. Pelaksanaan kaedah pencegahan (di awal kejadian), pengawalan (semasa kejadian) dan transformasi sebagai penyelesaian masa depan. Oleh yang demikian, penyelidikan yang dijalankan ini adalah sebagai usaha untuk membantu pihak kerajaan menangani ancaman ISIS ini dan sebagai panduan dalam membentuk polisi penyelesaian pada masa depan. Kajian yang berjaya dijalankan ini memfokuskan kepada kefahaman dan potensi penolakan atau penerima ideologi ISIS di kalangan belia-belia yang terdiri daripada pelajar Institut Pengajian Tinggi (IPT). Pelajar IPT yang bakal mewarisi kepimpinan negara pada masa depan sangat penting untuk difahami bagi membentuk generasi akan datang. Oleh yang demikian, pendekatan pencegahan adalah penting dalam memantau dan menyekat pengaruh ISIS dalam kalangan pelajar universiti. Mereka yang sentiasa terdedah dengan maklumat global untuk tujuan pengajian berkemungkinan turut mengikuti perkembangan konflik di Syria dan Iraq di media sosial. Justeru, fokus kajian ini adalah melihat kepada terhadap tahap penerimaan dan penolakan

pendekatan ekstrem ISIS dalam kalangan pelajar IPT di semenanjung Malaysia.

METODOLOGI

Kajian ini dijalankan dengan menggunakan kaedah kuantitatif, secara survey dengan berdasarkan soalan soal selidik. Di dalam pembentukan soalan-soalan soal selidik untuk proses pengutipan data, penyelidik juga menjalankan kaedah fokus kumpulan atau focus group dan juga temu bual. Tujuan kedua-ke dua kaedah ini dijalankan adalah untuk mendapatkan maklumat penting yang akan digunakan di dalam soalan soal selidik.

Memandangkan tempoh masa yang agak terhad, penyelidik menggunakan teknik kajian rentas atau cross-sectional study. Teknik ini adalah yang paling sesuai untuk tujuan pengutipan data. Kajian ini mengaplikasikan teknik kajian keratan rentas yang memerlukan penyelidik untuk mengumpul data hanya sekali dalam apa-apa sampel yang dipilih daripada populasi kajian (Zikmund, 2003) itu.

Bagi kajian ini, satu sampling frame lengkap tidak berjaya diperoleh memandangkan senarai nama pelajar bagi setiap IPTA di Malaysia adalah maklumat sulit. Situasi ini menyebabkan pensampelan secara rawak tidak dapat dijalankan akibat ketiadaan satu senarai lengkap kerangka pensampelan (sampling frame). Oleh kerana kekangan tersebut, teknik pensampelan yang digunakan dalam kajian ini adalah pensampelan pertimbangan (Judgmental sampling). Pensampelan pertimbangan “melibatkan pilihan responden yang berada dalam kedudukan yang terbaik untuk menyediakan maklumat yang diperlukan” (Sekaran, 2000, p. 278). Kaedah pensampelan adalah sesuai kerana sampel kajian ini memerlukan sifat-sifat tertentu dilampirkan kepadanya dalam rangka untuk memastikan tafsiran data adalah bermakna. Dalam proses menentukan sifat-sifat khusus yang akan dikenakan pada sampel, penyelidik membuat pertimbangan berasaskan tujuan dan konteks kajian. Apa-apa unsur yang besar yang boleh diguna pakai dalam menjawab persoalan kajian dengan tepat dianggap satu ciri yang penting yang pengkaji perlu melihat.

Berdasarkan objektif dan persoalan kajian ini, sifat yang digariskan untuk melayakkan responden menjadi sampel kajian adalah pelajar IPTA dan berstatus belia. Pensampelan pula dibuat mengikut kawasan iaitu zon utara (Kedah, Perlis, dan Perak), zon tengah (Selangor dan Kuala Lumpur), zon pantai timur (Kelantan dan Terengganu), dan zon selatan (Melaka, Negeri Sembilan, dan Johor). Setiap zon diperuntukkan 300 soalan soal selidik untuk diedarkan. Beberapa universiti awam di zon berkenaan akan di sampel. Ini menjadikan keseluruhan soal selidik yang diedarkan kepada pelajar IPT yang berstatus belia adalah sebanyak 1200 soal selidik.

Untuk kajian ini, unit analisis yang sesuai adalah unit individu. Secara khusus, unit analisis tersebut adalah pelajar-pelajar universiti awam dan swasta di

Semenanjung Malaysia. Satu lagi justifikasi penting mengapa individu digunakan sebagai unit analisis bagi kajian ini adalah disebabkan oleh hakikat bahawa kajian memerlukan pemahaman tingkah laku manusia di dalam konteks yang khusus. Mengkaji tingkah laku manusia memerlukan penyelidik untuk mengkaji orang dari tetapan persekitaran yang berbeza dan kumpulan-kumpulan sosial (Babbie, 2001). Ini membantu penyelidik untuk membuat generalisasi tentang populasi kajian.

Dalam kajian ini, soal selidik yang digunakan satu set soalan yang telah dibangunkan berasaskan kepada temu bual dan focus group. Soalan yang dibangunkan ini kemudiannya dilakukan pengujian beberapa kali sebelum diedarkan kepada para responden. Secara umum, soal selidik ini dipecahkan kepada beberapa segmen yang merangkumi seksyen A, seksyen B, dan Seksyen C. Seksyen A adalah berkenaan dengan data demografi responden. Seterusnya seksyen B adalah data berkenaan dengan pengetahuan responden tentang ISIS. Manakala seksyen C pula adalah soalan-soalan instrumen kajian yang berkisar tentang beberapa pemboleh ubah utama kajian. Secara terperinci, pengagihan soalan soal selidik adalah seperti di bawah.

Jadual 1: Susunan Soalan Soal Selidik Mengikut Dimensi Kajian

Dimensi/klasifikasi	Jumlah Soalan
Demografi	9 butiran
Pemahaman pelajar berkenaan ISIS	7 item
Penerimaan terhadap ISIS	8 item
Jumlah	24 item

DAPATAN KAJIAN

Responden kajian adalah dipilih dari institusi pengajian tinggi awam dan swasta di Semenanjung Malaysia yang telah dipecahkan kepada empat zon iaitu Utara, Tengah, Selatan dan Pantai Timur. Jadual 2 menunjukkan responden berselerak di dalam zon yang berbeza, di mana majoriti, iaitu 37.2 peratus (256), adalah berada di dalam Zon Tengah, diikuti oleh Zon Utara, iaitu 26.2 peratus (180), Zon Pantai Timur, iaitu 19.6 % (135), dan Zon Selatan, iaitu 16.9 peratus (116).

Jadual 2: Taburan Mengikut Zon

Zon	Kekerapan	Peratus
Zon Utara	180	26.2
Zon Selatan	116	16.9
Zon Pantai Timur	135	19.6

Zon Tengah	256	37.2
Jumlah	687	99.9

Jadual 3 pula menunjukkan taburan mengikut. Dari sudut jantina pula menunjukkan majoriti, iaitu 69.9 peratus (481), daripada responden adalah terdiri daripada pelajar perempuan manakala selebihnya, iaitu 30.1 peratus (207), adalah terdiri daripada pelajar lelaki.

Jadual 3: Taburan Mengikut Jantina

Jantina	Kekerapan	Peratus
Lelaki	207	30.1
Perempuan	481	69.9
Jumlah	688	100.0

Status perkahwinan responden dalam Jadual 4 menunjukkan hampir semua, iaitu 98.4 peratus (677), daripada responden adalah terdiri daripada pelajar bujang, diikuti oleh pelajar berkahwin, iaitu 1.5 peratus (10), dan pelajar janda, iaitu 0.1 peratus (1).

Jadual 4: Taburan Mengikut Status Perkahwinan

Status Perkahwinan	Kekerapan	Peratus
Bujang	677	98.4
Berkahwin	10	1.5
Janda	1	.1
Jumlah	688	100.0

Jadual 5 menjelaskan taburan mengikut anutan agama. Jadual menunjukkan hampir semua, iaitu 91.7 peratus (631), daripada responden adalah terdiri daripada pelajar agama Islam, diikuti oleh pelajar agama Buddha, iaitu 6.1 peratus (42), pelajar agama Hindu, iaitu 1.3 peratus (9), pelajar agama Kristian, iaitu 0.7 peratus (5), dan lain-lain, iaitu 0.1 peratus (1).

Jadual 5: Taburan Mengikut Agama

Agama	Kekerapan	Peratus
Islam	631	91.7
Buddha	42	6.1
Hindu	9	1.3

Kristian	5	.7
Lain-lain	1	.1
Jumlah	688	100

Jadual 6 menjelaskan taburan responden mengikut aliran persekolahan menengah. Taburan menunjukkan majoriti, iaitu 56.2 peratus (387), daripada responden adalah terdiri daripada pelajar Sekolah Kebangsaan, diikuti oleh pelajar Sekolah Agama, iaitu 36.2 peratus (249), pelajar Sekolah Jenis Kebangsaan, iaitu 4.9 peratus (34), dan pelajar Sekolah Vokasional/ Teknik, iaitu 2.6 peratus (18).

Jadual 6: Taburan Mengikut Aliran Persekolahan

Jenis Persekolahan	Kekerapan	Peratus
Kebangsaan	387	56.2
Jenis Kebangsaan	34	4.9
Vokasional/Teknik	18	2.6
Agama	249	36.2
Jumlah	688	100

Taburan mengikut jenis institusi pengajian tinggi (IPT) pula ditunjukkan melalui Jadual 7. Dapatan menunjukkan menunjukkan majoriti, iaitu 69.5 peratus (478), daripada responden adalah terdiri daripada pelajar Universiti Awam, diikuti oleh pelajar Universiti Swasta, iaitu 30.5 peratus (210).

Jadual 7: Taburan Mengikut Kategori Universiti

Kategori Universiti	Kekerapan	Peratus
Awam	478	69.5
Swasta	210	30.5
Jumlah	688	100.0

Tahap pengajian responden pada Jadual 8 menunjukkan majoriti, iaitu 69.0 peratus (475), daripada responden adalah terdiri daripada pelajar Ijazah, diikuti oleh pelajar Diploma, iaitu 27.8 peratus (191), pelajar Sarjana, iaitu 2.9 peratus (20), dan pelajar PhD, iaitu 0.3 peratus (2).

Jadual 8: Taburan Mengikut Tahap Pengajian

Tahap Pengajian	Kekerapan	Peratus
Diploma	191	27.8

Ijazah	475	69.0
Sarjana	20	2.9
PhD	2	.3
Jumlah	688	100.0

Jadual 9 adalah mengenai pembiayaan pengajian responden yang menunjukkan majoriti, iaitu 62.2 peratus (428), daripada responden adalah terdiri daripada pelajar yang mendapat pembiayaan PTPTN, diikuti oleh pelajar yang mendapat pembiayaan Biasiswa, iaitu 23.4 peratus (161), dan pelajar yang menggunakan Perbelanjaan Sendiri, iaitu 14.4 peratus (99).

Jadual 9: Taburan Mengikut Pembiayaan Pengajian


Pembiayaan	Kekerapan	Peratus
PTPTN	428	62.2
Perbelanjaan Sendiri	99	14.4
Biasiswa	161	23.4
Jumlah	688	100.0

Tahap Kefahaman Pelajar terhadap ISIS

Secara keseluruhannya, tahap kefahaman pelajar IPT terhadap ISIS adalah agak rendah, khususnya apabila pertanyaan yang dikemukakan kepada mereka mengenai ISIS adalah pertanyaan yang spesifik seperti hubungan ISIS dengan al-Qaeda dan fahaman sebenar ISIS. Paling menonjol adalah apabila masih ramai di kalangan pelajar IPT gagal memahami bahawa ISIS adalah pertubuhan pengganas.


Graf 1 menjelaskan dapatan mengenai tahap pengetahuan tentang bentuk pertubuhan ISIS. Dapatan menunjukkan 38 peratus (298) iaitu hampir separuh daripada responden, tidak memahami bentuk pertubuhan ISIS, iaitu, 14 peratus (90) menyatakan ISIS adalah pertubuhan politik dan 22 peratus (140) menyatakan ISIS adalah pertubuhan agama sedangkan ISIS sebenarnya adalah pertubuhan pengganas (62 peratus).

Graf 1 : Bentuk Pertubuhan ISIS




Graf 2 pula menjelaskan kefahaman tentang fahaman yang dianuti kumpulan ISIS. Sebanyak 60 peratus responden memberi respon merujuk kumpulan ISIS kepada fahaman Syiah, Sunni (24 peratus), Salafi (12 peratus) dan Sufi (4 peratus).


Graf 2 : Bentuk Pertubuhan ISIS



Selain itu, Graf 3 pula menunjukkan 51 peratus atau 330, iaitu hampir separuh daripada responden, tidak memahami perkaitan antara ISIS dengan Al-Qaeda dengan menyatakan ISIS dan Al-Qaeda tidak mempunyai hubungan sedangkan ISIS dan Al-Qaeda, sedangkan sebenarnya ISIS sebagai pertubuhan adalah berasal dari al-Qaeda.

Graf 3 : Kaitan ISIS dan al-Qaeda

Dari sudut penglibatan rakyat Malaysia terhadap ISIS, Graf 4 menunjukkan 67 peratus (454), iaitu majoriti daripada responden, memahami penglibatan rakyat Malaysia dalam perjuangan ISIS dengan menyatakan rakyat Malaysia terlibat dalam perjuangan ISIS .

Graf 4 : Penglibatan Rakyat Malaysia Dalam ISIS

Dapatan mengenai tahap kefahaman responden terhadap ISIS menunjukkan majoriti tidak mempunyai kefahaman jelas tentang ISIS walaupun mempunyai tahap akses terhadap sumber maklumat yang baik melalui pelbagai sumber sama ada bercetak ataupun dalam talian.

Dapatan ini amat menarik untuk dianalisa dengan lebih mendalam kerana jika sokongan kepada ISIS adalah berpunca daripada kepercayaan tidak betul responden mengenai ISIS maka salah satu langkah utama yang perlu dilaksanakan oleh pihak kerajaan untuk membendung pengaruh ISIS adalah membetulkan kepercayaan mereka mengenai ISIS. Selama mana rakyat Malaysia tidak meyakini bahawa ISIS adalah pertubuhan pengganas maka selagi itulah pengaruh ISIS akan tetap wujud.

Potensi Penerimaan Pelajar Ipt Terhadap Perjuangan Isis

Instrumen kajian untuk seksyen ini dibentuk untuk memahami potensi penerimaan dan para pelajar IPT terhadap ISIS serta faktor-faktor yang mempengaruhi tindakan tersebut.

Jadual 10 : Keputusan Analisa Tahap Penerimaan Pelajar IPTA Terhadap Ideologi ISIS

	N	Purata	Std. Deviation		Skewness		Kurtosis	
	Statistic	Statistic	Std. Error	Statistic	Statistic	Std. Error	Statistic	Std. Error
Penerimaan Pelajar IPT Terhadap ISIS	688	1.9233	.02761	.72412	.735	.093	-.059	.186

Jadual 10 di atas menjelaskan secara keseluruhannya tentang tahap penerimaan pelajar IPT terhadap ISIS. Dapatan memperlihatkan petunjuk positif bahawa tahap penerimaan pelajar IPT terhadap perjuangan ISIS adalah rendah, dengan min terkumpul sebanyak 1.92, dengan data bertaburan normal, dinilai dari segi skewness, 0.74 dan kurtosis -.059, iaitu kurang daripada 1/-1. Ini menunjukkan bahawa, secara keseluruhan, pelajar IPTA tidak dapat menerima ISIS sebagai satu pertubuhan yang perlu disokong. Jika dilihat secara mendalam, bagi setiap elemen, pecahan keputusan adalah seperti di bawah.

Jadual 11 pula menunjukkan secara lebih terperinci dapatan setiap untuk setiap item yang ditanya dalam soal selidik ini. Dari sudut kekerapan (frequency), dapatan menunjukkan responden secara majoriti tidak setuju menerima (54%) atau mengiktiraf balasan syurga untuk perjuangan ISIS (66.7%), menyumbang tenaga atau duit (54.8%), berdebat mempertahankan (63.7%), menderma untuk perjuangan ISIS (72.1%), mengajak rakan-rakan menyertai ISIS (80.9%), tidak menghubungi kenalan media sosial untuk mengajak menyertai ISIS (83.4%) atau membeli barangan-barangan berkaitan ISIS (81.2%).

Berbeza dengan peratusan majoriti yang tidak bersetuju, didapati sebahagian kecil responden memberi respons positif terhadap ISIS, antaranya: menghormati fahaman (15.1%) atau mengiktiraf balasan syurga untuk perjuangan ISIS (9.3%), menyumbang tenaga atau duit (19.5%), berdebat mempertahankan (6.8%), menderma untuk perjuangan ISIS (7.9%), mengajak rakan-rakan menyertai ISIS (4.8%), tidak menghubungi kenalan media sosial untuk mengajak menyertai ISIS (4.8%) atau membeli barangan-barangan berkaitan ISIS (4.2%). Responden selebihnya telah mengambil sikap berkecuali.

Dapatan ini amat menarik untuk dianalisa dengan lebih mendalam dan memerlukan pendekatan yang tuntas untuk mencari punca yang membawa kepada penerimaan sebahagian responden terhadap ISIS. Analisis yang lebih mendalam telah dilakukan terhadap beberapa faktor yang boleh mempengaruhi tahap penerimaan terhadap ISIS.

Jadual 11: Kekerasan dan Peratus Penerimaan Pelajar IPTA Terhadap Ideologi ISIS Berdasarkan Item Keseluruhan

Item Kajian	Peratusan (Kekerapan/Frequency)				
	S.T.S	T.S	T.P	S	S.S
Saya menghormati fahaman politik ISIS	230 (33.4%)	147 (21.4%)	176 (25.6%)	104 (15.1%)	30 (4.4%)
Menyertai ISIS boleh mendapat balasan syurga	351 (51.0%)	108 (15.7%)	160 (23.3%)	30 (4.4%)	34 (4.9%)
Saya sedia menyumbang wang ringgit	230 (33.4%)	147 (21.4%)	176 (25.6%)	104 (15.1%)	30 (4.4%)
Saya sentiasa berdebat mempertahankan	280 (40.7%)	158 (23.0%)	202 (29.4%)	42 (6.1%)	5 (0.7%)
Saya menderma untuk perjuangan ISIS	352 (51.2%)	144 (20.9%)	136 (19.8%)	44 (6.4%)	10 (1.5%)
Saya mengajak rakan-rakan untuk menyokong	433 (62.9%)	124 (18.0%)	98 (14.2%)	25 (3.6%)	8 (1.2%)
Saya menghubungi kenalan internet dan media sosial	422 (61.3%)	152 (22.1%)	80 (11.6%)	29 (4.2%)	4 (0.6%)
Saya membeli barangan berkaitan ISIS	386 (56.1%)	173 (25.1%)	100 (14.5%)	25 (3.6%)	4 (0.6%)

Nota: S.T.S (Sangat Tidak Setuju), T.S (Tak Setuju), T.P (Tak Pasti), S (Setuju), S.S (sangat setuju)

PERBINCANGAN

Ancaman keganasan oleh kumpulan ISIS telah menjadi isu utama di peringkat dalaman negara dan global. Kajian mengenai penerimaan pelajar IPT terhadap ISIS adalah penting untuk diteliti kerana golongan belia adalah sasaran utama propaganda dan perang saraf untuk tujuan penyebaran pengaruh, fahaman dan keahlian. Perbincangan akan dilakukan berkisar sekitar objektif, dapatan, penerangan dan perbandingan dengan literatur sedia ada.

Dapatan kajian menunjukkan bahawa tahap kefahaman pelajar secara umumnya adalah rendah. Responden didapati gagal memberi jawapan yang tepat terhadap persoalan mengenai tahap kefahaman asas tentang kumpulan penganas ISIS yang menjadi tumpuan penyelidikan ini. Walaupun majoriti mengakui bahawa ISIS adalah satu bentuk kumpulan penganas dan wujud penglibatan rakyat Malaysia dalam pergerakan kumpulan tersebut, tetapi mereka masih kurang memahami isu yang lebih mendalam, seperti berkaitan fahaman dan kaitan ISIS dengan pertubuhan al-Qaeda. Jawapan terhadap soalan mengenai aliran fahaman ISIS yang majoriti merujuk kepada Syiah diandaikan adalah lebih didorong oleh faktor sentimen,

berbanding pengetahuan mereka yang sebenar. Tahap pengetahuan dan pemahaman yang rendah dalam kalangan responden kajian memberi petunjuk bahawa walaupun tahap akses terhadap sumber maklumat dan internet yang tinggi dan baik adalah tidak menjamin para pelajar akan memanfaatkan sepenuhnya kemudahan tersebut untuk mendalami isu-isu sekeliling dan luar negara. Kekurangan pemahaman dan pengetahuan mengenai isu secara tepat boleh mendedahkan generasi belia terhadap anasir-anasir subversif yang cuba mempengaruhi pemikiran mereka.

Dalam konteks penyelidikan ini, secara khusus ia merujuk kepada ancaman perang saraf dan propaganda ISIS yang dilakukan secara umumnya melalui saluran media sosial yang menjadi tumpuan golongan belia masa kini. Malangnya, keadaan ini berlaku di sebalik peranan media tempatan dan antarabangsa memberi liputan meluas terhadap ancaman ISIS. Dapatan ini adalah selari dengan kajian lalu mengenai persepsi terhadap ancaman oleh Bakri & Ratnaria (2007). Tahap pengetahuan yang rendah adalah boleh dikaitkan dengan faktor sumber ancaman yang bukan bersifat domestik. Fokus responden adalah terarah kepada ancaman yang bersifat segera (*immediate*) yakni persekitaran di mana mereka berada. Ancaman ISIS tidak dilihat sebagai keutamaan kerana Malaysia secara umumnya dianggap selamat, dan ancaman ISIS pada dasarnya bukan berpunca daripada sumber domestik, tetapi berpusat di Timur Tengah. Kajian oleh Huddy, Feldman, Taber, & Lahav (2005) juga turut mengaitkan faktor psikologi di mana individu akan memberi keutamaan kepada 'immediate threat' berbanding dengan ancaman yang lain yang wujud walaupun ancaman tersebut juga dianggap penting. Dapatan ini amat menarik untuk dianalisa dengan lebih mendalam kerana jika sokongan kepada ISIS adalah berpunca daripada kepercayaan tidak betul atau songsang responden mengenai ISIS maka salah satu langkah utama yang perlu dilaksanakan oleh pihak kerajaan untuk membendung pengaruh ISIS di kalangan rakyat Malaysia adalah bagi memberikan kefahaman kepada mereka mengenai ISIS dan bahayanya ideologi ekstrem Salafi yang mereka bawa. Selama mana rakyat Malaysia tidak meyakini bahawa ISIS adalah pertubuhan penganas maka selagi itulah pengaruh ISIS akan tetap wujud. Tahap penerimaan pelajar IPT terhadap perjuangan ISIS juga adalah rendah dengan min terkumpul kurang daripada 2.00 dan nilai purata min yang konsisten di bawah 3.00 untuk setiap item yang dikaji. Fenomena ini menunjukkan tahap kesedaran yang baik dalam kalangan responden pelajar IPT yang dikaji. Ia adalah satu petunjuk yang baik dari aspek keselamatan negara. Ia juga bermaksud, walaupun pelajar IPT sebagai generasi yang terdedah kepada pelbagai sumber maklumat disebabkan faktor tahap akses yang tinggi terhadap internet, potensi penerimaan yang negatif menunjukkan bahawa majoriti pelajar adalah tidak terpengaruh kepada anasir subversif. Kajian ini pada asasnya juga menepati kajian-kajian lalu tentang persepsi terhadap ancaman seperti dilakukan oleh Bakri & Ratnaria (2007) dan Jacobson (1991) yang menunjukkan bahawa pembentukan persepsi ancaman (*threat perception*) adalah berkait rapat dengan terhadap kejadian-kejadian yang dianggap sebagai penunjuk aras kepada ancaman. Dalam hal ini, tindak tanduk ISIS seperti yang dipaparkan melalui media massa dilihat sebagai satu bentuk ancaman kepada keselamatan.

Walau bagaimanapun, kajian menunjukkan bahawa masih terdapat sejumlah kecil responden (pada kadar 5-15%) yang menerima, masih tidak pasti, bersedia menyokong perjuangan ISIS atau tidak menolak perjuangan kumpulan ISIS. Ini bermaksud pihak berwajib harus mencari jalan mengenalpasti golongan sasaran dan mendekati golongan ini secara langsung untuk memahami dan menangani permasalahan yang wujud. Walaupun bilangan mereka adalah kecil, tetapi angka tersebut adalah signifikan kerana kumpulan pengganas radikal kebiasaannya beroperasi pada skala keanggotaan yang kecil selari dengan konsep peperangan tidak regular (*irregular warfare*). Hasil kajian ini amat menarik untuk dianalisa dengan lebih mendalam dan memerlukan pendekatan yang tuntas untuk mencari jalan penyelesaian yang baik kerana tindakbalas positif responden memberi persepsi negatif bahawa mereka mungkin boleh dipengaruhi ISIS, atau telah terpengaruh dengan propaganda ISIS secara langsung atau tidak langsung.

CADANGAN DASAR

Walaupun sebelum ini ISIS tidak dilihat sebagai ancaman mendesak kerana pejuang ISIS dari kalangan warga Malaysia tidak melakukan aktiviti keganasan mereka di Malaysia, sebaliknya pergi ke Syria dan Iraq bersama pejuang ISIS lain di sana. Namun, dengan suasana konflik di Asia Barat yang semakin meruncing, Malaysia seharusnya perlu berhadapan dengan strategi baru ISIS yang mungkin cuba untuk menggugat keamanan di Malaysia. Ratusan rakyat Malaysia yang terlibat menyertai ISIS dibimbangkan akan menjalankan aktiviti keganasan mereka di Malaysia.

Oleh itu, satu strategi anti radikalisme dan anti keganasan harus dilaksanakan oleh agensi keselamatan negara khususnya yang melibatkan perkongsian maklumat risikan dan aktiviti ketenteraan antara Malaysia dan negara-negara lain khususnya ASEAN. Secara umumnya, di Malaysia beberapa langkah boleh dilakukan untuk menangani ancaman ISIS ini. Pertama, aktiviti pengambilan ahli baru ISIS di kalangan belia haruslah dipantau dan disekat. ISIS dilihat cuba menarik para belia Malaysia khususnya yang menghadapi masalah kehidupan, masalah sosial dan masalah pemahaman keagamaan untuk dikuasai minda mereka bagi menyertai ISIS. Malah ada kes yang menunjukkan bahawa golongan belia Malaysia yang tertarik dengan ISIS adalah kerana menyertai jihad adalah cara mudah menyucikan diri dari dosa yang dilakukan sebelumnya. Oleh itu, Kementerian Belia dan Sukan juga harus berstrategi untuk berhadapan dengan belia seperti melakukan kempen untuk belia ini menjauhi aktiviti ISIS.

Seterusnya, pelbagai pihak di dalam negara harus berhadapan dengan ideologi ISIS yang boleh menggugat keharmonian masyarakat Malaysia. ISIS dilihat menganuti fahaman atau ideologi Jihadi Salafi atau Salafisme. Fahaman ini harus dibanteras melalui kaedah ilmiah kerana mereka berhujah akan keperluan menyertai jihad bersama ISIS melalui manipulasi ke atas al-Quran dan Hadis. Oleh itu, pihak yang harus bertanggungjawab berhadapan dengan hujah Jihadi Salafi ini haruslah

datang daripada Jabatan Kemajuan Islam Malaysia (JAKIM), majlis dan jabatan agama negeri. Seharusnya JAKIM mempunyai jentera gerak saraf yang berhadapan dengan pihak ISIS ini dengan hujah al-Quran dan Hadis sebenar. Perisytiharan fatwa mengharamkan ISIS dan aktiviti mereka tidak cukup. Perdebatan idea harus dilakukan supaya rakyat Malaysia faham akan perkara sebenar.

Akhir sekali, kawalan media sosial juga harus dilakukan. Ternyata bahawa ISIS mendapat sokongan dan simpati ke atas perjuangan mereka daripada golongan belia yang melayari media sosial. Malah ISIS berjaya mendapat merekrut ahli baru dan sumber kewangan juga daripada para warga media sosial yang bersimpati dengan perjuangan ISIS. Oleh itu, pemantau juga harus dilakukan oleh pihak Polis, Suruhanjaya Komunikasi dan Multimedia dan agensi Cyber Security Malaysia untuk membendung penularan propaganda ISIS ini. Malah pihak JAKIM juga boleh mewujudkan tentera siber mereka untuk berhadapan dengan idea dan hujah jihadi salafi tadi.

KESIMPULAN

Pada bulan November 2016 yang lalu, berlakunya serangan rambang di Paris, Perancis yang membunuh lebih 140 orang oleh pejuang kumpulan pengganas Negara Islam untuk Iraq dan Syria (ISIS). Malah pejuang ISIS juga telah mengaku bertanggungjawab megebom pesawat Rusia yang meletup di udara Semenanjung Sinai, Mesir. Insiden tebusan di Mali juga dikatakan melibatkan pejuang ISIS (Mohd Azizuddin, 2015: 30). Kecepatan berlakunya insiden keganasan kini memperlihatkan strategi ISIS untuk memperluaskan konflik di Syria dan Iraq ke seluruh dunia. Ini kerana negara-negara sekutu Amerika Syarikat (AS) dan Rusia mula melancarkan serangan udara bertali arus ke wilayah yang dikuasai ISIS. Untuk mengalihkan tumpuan kuasa besar ini daripada serangan di Iraq dan Syria, mereka mula menyerang masyarakat di Eropah dan Afrika bagi menakut-nakutkan rakyat negara terbabit lantas mengalihkan tumpuan ketenteraan Barat khususnya ke atas keselamatan domestik berbanding terlibat dengan serangan di Asia Barat.

Ancaman yang hebat dari ISIS kini telah menyebabkan Presiden AS Barack Obama ketika menghadiri Sidang Kemuncak ASEAN Ke-27 pada 18-22 November 2015 ini menjelaskan bahawa tumpuan utama sidang kali ini adalah membincangkan cara terbaik menghadapi ancaman ISIS selain isu utama lain seperti krisis di Laut China Selatan. Ketika sidang ASEAN ini, pihak keselamatan Malaysia telah mengerahkan seramai 4,500 tentera dan ribuan polis untuk mengawal keselamatan sepanjang sidang ASEAN ini berlangsung dengan kehadiran 18 pemimpin utama dunia di Kuala Lumpur (Mohd Azizuddin, 2015: 30).

Secara umumnya, ancaman ISIS ini telah menjadi ancaman mendesak bagi Malaysia menanganinya secara bijaksana. Setakat ini pihak keselamatan Malaysia dilihat dapat membendung ancaman ISIS ini kerana warga Malaysia yang terlibat

kini kebanyakannya adalah anggota veteran pejuang salafi yang sebelum ini pernah juga terlibat dengan al-Qaeda dan Jemaah Islamiyah. Namun, proses pembanterasan radikalisasi dan keganasan harus diteruskan bagi memastikan Malaysia terus kekal aman dan makmur.

RUJUKAN

- Azeem, I. (2014) *The Resurgence of al-Qaeda in Syria and Iraq*. Atas talian, akses: 15 Mac 2015. Boleh diperolehi melalui <http://www.strategicstudiesinstitute.army.mil/pdf/files/PUB1210.pdf>
- Azrai, M. 2015 *Dua Militan IS Malaysia rakan video sembelih*. Atas talian, akses: 14 Mac 2015. Boleh diperolehi melalui <http://www.utusan.com.my/berita/jenayah/dua-militan-is-malaysia-rakam-video-sembelih-1.66124>
- Bakri Mat & Ratnaria Wahid 2007. *Ancaman Penganas dan Keselamatan Negara Selepas Peristiwa 11 September 2001*. Laporan Penyelidikan (Geran Fakulti). Universiti Utara Malaysia
- Barrett, R. 2014 *The Islamic State*. Atas talian, akses: 19 Mac 2015. Boleh diperolehi melalui <http://soufangroup.com/wp-content/uploads/2014/10/TSG-The-Islamic-State-Nov14.pdf>
- Elliot, F. 2014 *Special Report, The Islamic State*. Atas talian, akses: 22 Mac 2014. Boleh diperolehi melalui <http://www.clarionproject.org/sites/default/files/islamic-state-isis-isil-factsheet-1.pdf>
- Jabatan Perdana Menteri 2015. *Kerta Putih 'Ke Arah Menangani Ancaman Kumpulan Islamic State'*, Kementerian Dalam Negeri Malaysia, Atas talian, boleh diperolehi melalui http://www.pmo.gov.my/home.php?menu=speech&page=1676&news_id=745&speech_cat=2
- Jacobson, D. 1991 *Toward a theoretical distinction between the stress components of the job insecurity and job loss experiences*, *Research in the Sociology of Organizations*, 9: 1–19.
- Kenneth, K., Christopher, M.B., Carla, E.H., Rhoda, M. & Matthew, C.W. 2015 *The "Islamic State" Crisis and U.S. Policy*. Atas talian, akses: 20 Mac 2015. Boleh diperolehi melalui <https://fas.org/sgp/crs/mideast/R43612.pdf>
- Mohd Azizuddin Mohd Sani 2015. *Malaysia perlu tangani ancaman IS secara bijaksana*. *Berita Harian*, 24 Nov.2015: hlm.30.
- Organization of Islamic Cooperation (OIC) 2014. *Islamic State of Iraq and the Levant (ISIL)*. 36th Annual Conference of Organization of Islamic Cooperation

(OIC). Atas talian, akses: 12 Februari 2015. Boleh diperolehi melalui http://www3.canisius.edu/~diciccoj/MUN_2014_OIC_ISIL.pdf

Patrick, B.J. 2014. Countering ISIL's Financing. Atas talian, akses: 19 Mac 2015. Boleh diperolehi melalui http://www.rand.org/content/dam/rand/pubs/testimonies/CT400/CT419/RAND_CT419.pdf

Pengebom berani mati rakyat Malaysia. 2014. Atas talian, akses: 13 Mac 2015. Boleh diperolehi melalui <http://www.utusan.com.my/berita/nasional/pengebom-berani-mati-rakyat-malaysia-1.34334>

Sageman, M. 2004. Understanding terror networks. Philadelphia: University of Pennsylvania Press.

Silber, M. D., and A. Bhatt. 2007. Radicalisation in the West: The Homegrown Threat. New York: The New York City Police Department

Zharif, B. 2015 Perangkap IS melalui media sosial. Atas talian, akses: 15 Februari 2015. Boleh diperolehi melalui <http://www.utusan.com.my/rencana/perangkap-is-8232-melalui-media-sosial-1.47329>

Profile penulis:***Che Mohd Aziz Yaacob, Phd***

*Pusat Pengajian Antarabangsa, UUM COLGIS
Universiti Utara Malaysia
cmaziz@uum.edu.my*

Bakri Mat, Phd

*Pusat Pengajian Antarabangsa, UUM COLGIS
Universiti Utara Malaysia
bakri@uum.edu.my*

Fakhrorazi Ahmad , Phd

*Pusat Pengajian Antarabangsa, UUM COLGIS
Universiti Utara Malaysia
fakhrorazi@umm.edu.my*

Mohd Azizuddin Mohd Sani, Phd

*Pusat Pengajian Antarabangsa, UUM COLGIS
Universiti Utara Malaysia
azizuddin@uum.edu.my*

Rusdi Omar , Phd

*Pusat Pengajian Antarabangsa, UUM COLGIS
Universiti Utara Malaysia
rusdiomar@uum.edu.my*

Kamarul Zaman Hj. Yusoff , Phd

*Pusat Pengajian Antarabangsa, UUM COLGIS
Universiti Utara Malaysia
kzaman@uum.edu.my*